

ՄՐԲՈՑ ՂԵՎՈՆԴՅԱՆՑ ՏՈՆԸ ՄԱՅՐ ԱԹՈՌ ՍՈՒՐԲ ԷԶՄԻԱԾՆՈՒՄ

Հունվարի 29-ին Մայր Աթոռ Սուրբ Էջմիածնում հանդիսավորությամբ նշվեց Սուրբ Ղևոնդյանց քահանաների տոնը: Տոնի առիթով Միածնաէջ Մայր Տաճարում, հանդիսապետությամբ Ն.Ս.Օ.Տ.Տ. Գաբեգին Բ Ծայրագույն Պատրիարք և Ամենայն Հայոց Կաթողիկոսի, մատուցվեց Սուրբ Պատարագ: Պատարագիչն էր Տ. Ընծա քահանա Միրզոյանը (Մյունյաց թեմ): Պատարագին ներկա էին Հայաստանյայց Առաքելական Սուրբ Եկեղեցու թեմակալ առաջնորդներ, Մայր Աթոռի միաբաններ, Հայաստանի և Արցախի թեմերում սպասավորող քահանաներ:

Ս. Պատարագի ընթացքում խոսված իր քարոզում Տեր Հայրը ներկայացրեց տոնի խորհուրդը՝ անդրադառնալով Ղևոնդյանց քահանաների պատգամին: «Ս. Ղևոնդյանց հիշատակն այսօր և միշտ մեզ համար կոչ է և հրավեր՝ հոգեպես սփռվելու և նորոգվելու: Ղևոնդյանց ոգու կրողն ու ներդրողը մենք ենք այսօր, հոգևոր դաստիարակներն ու առաջնորդներն ենք մեր ժողովրդի, և ոչ միայն խոսքով, այլև մեր ողջ էությամբ, մեր կյանքի օրինակով, մեր առաքինի նկարագրով: Թող Աստված ուժ և կարողություն տա մեզ բոլորիս, որ մեր այդ հոգևոր առաքելությունը միասնաբար տանենք, լինենք միշտ այնպես, որ մարդիկ մեզ նայելով՝ մեր խոսքերի միջով ոչ թե մեզ տեսնեն, այլ՝ Քրիստոսին, Լուսավորչին, Մեսրոպ Մաշտոցին, Ղևոնդ Երեցին և բոլոր այն սրբերին ու հերոսներին, ովքեր չերկնչեցին զոհելու իրենց կյանքը: Չղո՛ղացին, չերկյուղեցին, որպեսզի շատերին փրկեն, որպեսզի ազգի կյանքը շարունակվի և միշտ փառավոր լինի: Լինենք Աստծո հավատարիմ մշակներ, Աստծո տաճարներ լինենք, որպեսզի մեր ծառայությամբ ուժեղանա հոգևոր լույսը մեր ժողովրդի կյանքում», - ասաց Տեր Ընծան իր խոսքում:

Տոնի առիթով Մայր Աթոռում տեղի ունեցավ ավանդույթ դարձած քահանայից ամենամյա հավաք: Ժողովը բացվեց Շիրակի թեմի առաջնորդ Տ. Միքայել եպիսկոպոս Աջապահյանի ողջույնի խոսքով: Հընթացս ժողովի ներկայացվեցին զեկուցումներ «Քահանայական փորձառությունը աղանդավորների հետ հովվական աշխատանքում» թեմայի շրջանակում: Բանախոսություններ ներկայացրեցին Տ. Վրթանես քահանա Բաղայանը (Գուգարաց թեմ), Տ. Կյուրեղ քահանա Տալանը (Կոտայքի թեմ), Տ. Վարուժան քահանա Տերտերյանը (Շիրակի թեմ), Տ. Գևորգ քահանա Տեր-Բարսեղյանը (Գեղարքունյաց թեմ) և Տ. Ներսես քահանա Ռուշանյանը (Արագածոտնի թեմ), ովքեր անդրադարձան կրոնական տարբեր չարափառ հոսանքների հարող անձանց հետ հովվական աշխատանքի ընթացքին, առնչություններին, արձանագրած հաջողություններին ու դժվարություններին: Այնուհետև տեղի ունեցավ քննարկում այս թեմայով:

Քահանայից հավաքը եզրափակվեց Ամենայն Հայոց Հայրապետի օրհնության խոսքով: Նորին Սրբությունն ուրախություն հայտնեց, որ հերթական անգամ հոգևոր

րականությանը հնարավորություն է ընձեռվել համախմբվելու Մայր Աթոռում, միասնաբար աղոթելու և վերանորոգելու իրենց ուխտը, ինչպես նաև ունկնդիր լինելու միմյանց մտահոգող խնդիրներին, հաղորդ դառնալու միմյանց փորձառությանը: Անդրադառնալով օրվա նյութին՝ Վեհափառ Հայրապետը ի մասնավորի ասաց. *«Կան կրոնական կազմակերպություններ, որոնք գործում են և իրենց քարոզչությամբ շարունակում են ավեր գործել՝ հեռացնելով մեր զավակներին իրենց ճշմարիտ հավատքից, և մենք, որպես Եկեղեցի, չենք կարող անտարբեր լինել այս երևույթի նկատմամբ՝ անկախ այն բանից, թե որքան է արդյունավետությունը նրանց աշխատանքի և կամ որքանով են նրանք հաջողում իրենց չար նպատակների ու չար գործունեության մեջ: Մենք պետք է շարունակենք մեր առաքելությունը՝ մեր զավակներին պահել Մայր Եկեղեցու հարկի ներքո և հովանու տակ»:*

Ամենայն Հայոց Հայրապետն ընդգծեց նաև հովվական առաքելության արդյունավետության մեջ կոչման ու նվիրումի առանցքային դերը. *«Մեր աշխատանքի արդյունավետությունը, մեր գործունեության և առաքելության հաջողությունը կախված է յուրաքանչյուրիս նվիրյալ աշխատանքից, հավատավոր գործից, մեր ծառայության մեջ մեր ներդրած սիրուց: Որքան մենք ջանք ենք ներդնում մեր աշխատանքում, մեր առաքելության մեջ, այդքան էլ արդյունավետություն կունենանք: Հոգևոր սպասավորությունը, հովվական ծառայությունը եթե մենք դիտարկում ենք որպես պարտականություն ու պաշտոն մեր կյանքում, բնականաբար արդյունքն էլ այդպիսին պիտի լինի: Բայց եթե նվիրում է, ամբողջական հանձնառություն է, Աստծո նկատմամբ ստանձնած պարտավորություն է, ուխտ է, բնականաբար ոչ մի դժվարություն չի կարող կասեցնել արդյունավետությունը մեր ծառայության մեջ»:*

Նորին Սրբությունն ուրախությամբ արձանագրեց, որ տարեցտարի աճում է եկեղեցականների թիվը, թեմերը գործանում են, շենանում են եկեղեցիները, բնակավայրեր, համայնքներ ու քաղաքներ օժտվում են նոր եկեղեցիներով:

Վեհափառն իր գնահատանքը հայտնեց քահանայից դասին, որ նվիրումով ծառայություն է բերում հայ ժողովրդին, որպեսզի նա հավատարիմ մնա հայրերի հավատքին, անհրաժեշտ գիտելիքներ ձեռք բերի և ճշմարիտ քրիստոնյայի լիարժեք կյանքով ապրի: Նորին Սրբությունն իր գնահատանքը բերեց թեմակալ առաջնորդներին՝ իրենց նվիրյալ ջանքերի ու հանձնառությունների համար, ինչպես նաև Միքայել Սրբազանին՝ քահանայից հավաքն օգտակար և արդյունավետ ձևով կազմակերպելու համար:

Հավարտ իր խոսքի Ամենայն Հայոց Կաթողիկոսն Աստծո օրհնությունն ու օգնականությունը մաղթեց Հայաստանյայց Առաքելական Եկեղեցու հոգևոր մշակներին, որ Տիրոջ Աջը մշտապես հովանի լինի ու խանդավառի նրանց իրենց առաքելության մեջ ի փառս Աստծո և ի բարօրություն մեր ժողովրդի:

Վերջում տեղի ունեցավ շնորհաբաշխություն: Ամենայն Հայոց Կաթողիկոսի ձեռամբ, իրենց հովվական առաքելության մեջ ունեցած վաստակի համար որպես պարգևատրում լանջախաչ ստացան տասնութ, ծաղկյա փիլոն կրելու իրավունք՝ երեք և



Ս. ՂԵՎՈՆԴԻՅԱՅ ՏՈՆԻՆ ՄԱՏՈՒՅՎԱԾ Ս. ՊԱՏԱՐԱԳԻ ԸՆԹԱՅՐՈՒՄ



ավագ քահանայության պատիվ՝ երեք քահանաներ: Ապա ամենքը մասնակցեցին Երեկոյան ժամերգության:

Հունվարի 30-ին Մայր Աթոռում շարունակվեցին տոնակատարությունները: Վաղ առավոտյան եկեղեցականների հանդիսավոր թափորը Վեհափառ Հայրապետին առաջնորդեց Մայր Տաճար, ուր կատարվեց Արևագալի ժամերգություն: Ապա Նորին Սրբության նախագահությամբ սկսվեցին քահանայից հավաքի երկրորդ օրվա աշխատանքները:

Հընթաց ժողովի զեկուցումներով հանդես եկան Ս. Մեսրոպ քահանա Արամյանը (Արցախի թեմ), Ս. Շմավոն քահանա Ղևոնդյանը (Արարատյան Հայրապետական թեմ), Ս. Շիրակ քահանա Խանոյանը (Սյունյաց թեմ), Ս. Գևորգ քահանա Կրտիկաշյանը (Արմավիրի թեմ): Քահանաներն իրենց բանախոսություններում անդրադարձան Եկեղեցու քարոզչության առավել աշխուժացման անհրաժեշտությանը: Կարևոր նկատվեց ժամանակակից տեխնիկական և լրատվական զանազան միջոցների արդյունավետ գործածությունը քարոզչական գործունեության մեջ:

Քահանայից հավաքի երկրորդ օրն ամփոփվեց Ամենայն Հայոց Հայրապետի օրհնության խոսքով: Նորին Սրբությունը հորդորեց եկեղեցականներին Ղևոնդյանց ոգով իրենց ծառայությունը մատուցել մեր ժողովրդին և Հայրենիքին:

ՎԱՐԴԱՆԱՆՑ ՏՈՆԸ ՄԱՅՐ ԱԹՈՌ ՍՈՒՐԲ ԷԶՄԻԱԾՆՈՒՄ

Հունվարի 31-ին՝ Սրբոց Վարդանանց տոնին, Մայր Աթոռ Սուրբ Էջմիածնում Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսի հանդիսապետությամբ մատուցվեց Ս. Պատարագ: Պատարագիչն էր Գևորգյան Հոգևոր Ճեմարանի տեսուչ Ս. Սահակ վարդապետ Մաշալյանը:

Հավարտ Ս. Պատարագի Վարդանանց խորհրդին անդրադարձավ պատարագիչ Հայր Սուրբը: Նշելով, որ Ավարայրի մարտը ընթանում էր հանուն հայ հավատի ու ոգու պահպանման, Հայր Սուրբն ասաց. «Մեր պատմության ընթացքում մենք բազմիցս կորցրել ենք մեր պետականությունը, սակայն քանի որ կանգուն էր մեր միջնաբերդը՝ Հայ Առաքելական Եկեղեցին, և մեր հավատքը, մենք վերստին կարողացել ենք կերտել մեր ներկան և ապագան»:

Վարդանանց տոնին Հայ Եկեղեցին տոնում է նաև Ն.Ս.Օ.Տ.Տ. Գարեգին Բ Ամենայն Հայոց Կաթողիկոսի անվանակոչության օրը: Այս առիթով Իջման Ս. Սեդանի առջև կատարվեց Հայրապետական մաղթանք՝ Մայր Աթոռ Սուրբ Էջմիածնի անսասանության ու պայծառության և Նորին Սրբության քաջառողջության ու կենաց արևշատության համար:

Սրբազան արարողությանը ներկա էին Հայաստանյայց Առաքելական Սուրբ Եկեղեցու թեմակալ առաջնորդներ, Մայր Աթոռի միաբաններ, Գևորգյան Հոգևոր Ճեմարանի սաներ և բարեպաշտ հավատացյալներ: